

Ciet Vwnzva Nienzgai Bwzguyauz:

Leihndei Doxhuz Nauhyied Hoenghhwd

热闹非凡祥和美好的白裤瑶年街文化节

□ Dien Namzsingingj Sinhyungz hoiz

Gaeq doxdoj ndei yawj, lenzgyawj vunz humx rim.



▲ Sau lengj bae byaij gai, vunzlai naeuz ndei yawj.



▲ Boq digngox gaeuvaiz, vunzlai naeuz ndei dingq.



▲ Seusiuq sien veh doz, sienq mbouj goz cij soh.



▲ Foux gaeuvaiz ndei yawj, dauqcawq nyi kaenh ndei.



▲ Dajsiuq cim dem cim, ndaw sim caeux miz soq.



▲ Ngon ciengq gosaeqvah, cienz vwnzva maenhndei.



▲ Yawj dwkgyangq doxdax, lwgda riengz gyangq baenq.



▲ Caez diuq foux gyaepbangx, anggyangz youq ndaw sim.

Moix bi ngoenzhaw gatsat cieng cibngux yaek daengz seiz, beixnuengx Bwzguyauz Nanzdanh Yen cungj angqvauvau gvaq ngoenzciet nienzgai. Ngoenz neix, gyoengq vunzlai Lijhuz、Bazhih song aen Yauzcuz yangh neix cungj cangndang moqsup gyaueget, foedfoed nanghnangh comz daengz gwnzhaw ndaw yangh camgya hozdung yawj nauhyied, guh gaicawx, vunz cien vunz fanh, nauhyied dangqmaz. Gij hozdung fungsug minzcuz gig miz daegsaek haenx caemh yinx haujlai hekyouz bae ngonzyawj, caenh raen gwnzhaw vunz caenx ndaetfwdfwd, nauhyied hoenghhwd, leihndei doxhuz.

Bwzguyauz dwg Yauzcuz ndawde nga ndeu, gyoengqde gag heuh bonjfaenh guh "Giznuj", aenvih gij vunzsai de cungj daenj diuz vaqhou gij raez ngamq goemq gvaq gyauejhoq ndeu cix ndaej heuhguh "Bwzguyauz", gyoengqde cujyau dwg comzyouq Lijhuz、Bazhih song aen Yauzcuz yangh ndaw yienh Nanzdanh, gyauejvunz daih' iek miz 3 fanh vunz, aenvih gyoengqde ciengzgeiz gvaq gij saedceij gyokgyog ciuhnduj, seizneix lij louz miz gij fungsug sibgvenq daegbied gag miz de、gij yisuz vwnzva ndawbiengz minzcuz dijbauj de caeuq gij ndangdaenj minzcuz daegbied de, ndaej heuhguh "sigvaq lixlw fungsug minzcuz". Ciuq gij fungsug sibgvenq dangdieg gaenq riuzienz nanz raeuh de, moix bi ngoenzhaw gatsat yaek daengz cieng cibngux, beixnuengx Bwzguyauz cungj angqyangz doxcomz gvaq nienzgai. 2013 nienz, Nanzdanh Yen dawz cungj fungsug sibgvenq nienzgai

neix dingh guh "ciet vwnzva nienzgai Bwzguyauz Cungguck". Ngoenz neix, gij beixnuengx Yauzcuz Lijhuz、Bazhih song aen Yauzcuz Yangh nem gij beixnuengx Yauzcuz Gveicouh dep song aen yangh neix haenx, cungj daenj gij ndangdaenj bonj minzcuz youh moq youh lwenq de comz daengz gwnzhaw ndaw yangh, angqyangz guh gak cungj gak yiengh hozdung, dwkgyangq doxdax, doiq fwenyoux, diuq foux nyenz boq digngox, boq gaeuvaiz yienj heiq minzcuz daengj. Youq diegdangz gyauejhaw, laj diemq gwnzhaw, gyoengq vunzsai camgya roeg doxdoj gaeq doxdoj dwkgyangq doxdax, boq gaeuvaiz roq nyenz diuq foux eu Fwenyauz, nyingz naq nyingz cungq beij nyingzcinj; gyoengq mehmbwk cix dozmae heuxmae baij luengqmae, at baengz dajsiuq nem vehgau, baijyienj ndangdaenj Yauzcuz, doxlwnh doxbeij dinfwngz. Mwngz yawj, dwkgyangq nyingzcungq daengj doxdax gaenjcienq haenq-hwd, mizyinx raixcaix, gyoengq bouxyawj yawj dwk maezmwd deihdeih bekwngz haenh ndei; caiq yawj gyoengq mehmbwk baijyienj ndangdaenj Yauzcuz, yienj heiq fungsug fungcingz Yauzcuz, fungcingz daegbieg, dauq yienh yienghgeq, ndei yawj mizyinx, bouxhek caemh bekwngz mbouj dingz. Baez daengz doengxhaemh, hoihaemh dongfeiz youh riengzdwk nauh hoengh hwnjdaeuq, gyoengq vunzmbanj caeuq hekyouz fwngz gaem fwngz, hopngomx dongfeiz ciengq ha diuq ha, sing riu sing angq haprwenz byonghmbwn, baenz hwnz mbouj sanq.



▲ Dozmae baenz yienghneix, baengz ndei daemj ndaej baenz.